



KIMIAD


Kinniget da H. K. (LANGONNET).



Red e din-me kuitat ma bro gër, Red



e din-me monet pell doch ar gër. Keno dach-hu,



ma mam ga-ret, Ma mam gla-cha-ret.

Red e d'in-me kuitat ma bro ger,
Red e d'in-me monet pell doc'h ar gër.
Keno d'ac'h-hu, ma mam garet,
Ma mam glac'haret.

Disul vintin, goude 'n oferen,
War ve ma zad, eur wech c'hoaz e peden.
Keno d'ac'h-hu, ma zad karet,
Brema er vered.

Ma breur Even ha ma c'hoar Anna,
Ouz ho kuitat, ma c'halon a ranna.
Keno d'ac'h-hu, n'ho kwelin ken,
Oh ! nan, birviken !

Ar bodig brug, el lann diwanet,
Na groga ken, eur wech a ve tennet ;
Me eveltan, e mez ma bro,
Me a zizec'ho.

Klevet a ran kan an alc'houeder,
Labousig mad, e galon zo zeder.
Hen a chomo en Breiz-Izel,
'N e vro Breiz-Izel.

Lies ive, war ar roz da véz,
Me 'm eus kanet, kanet hed an devez,
Kanaouennou ma Breiz-Izel,
Ma bro Breiz-Izel.

Mineou du, dreist-oc'h, pell du-ze,
'Vel eur voul dan, an heol-hanv a guze....
Mineou du ma Breiz-Izel
Ma bro Breiz-Izel.

Koat Lein-Ar-Ster, elec'h a grenen,
Goude serr-noz, pa vijen o tremen...
Koat Lein-Ar-Ster, koat Breiz-Izel,
Ma bro Breiz-Izel.

Gwazig vihan, a glevan 'vrudi,
Ouzoc'h ive me 'z a da gimiadi;
Gwazig vihan ma Breiz-Izel,
Ma bro Breiz-Izel.

Prad ar Genkiz, ennoc'h e welen
Bokidi koant, ru, gwenn, glas ha melen...
Bokidi koant ma Breiz-Izel,
Ma bro Breiz-Izel.

Lann ar vilin, lann vras Barregan,
A-hed an hanv, ennoc'h ar skrilh a gan...
Lann ar vilin, lann Breiz-Izel,
Ma bro Breiz-Izel.

C'houez ha c'houez vad a zav en pep tu,
Gant foen troc'het ha gant bleun gwini du...
C'houez ha c'houez vad ma Breiz-Izel,
Ma bro Breiz-Izel.

Leur-gér Talroz, glas 'vel eur flouren,
Leur-gér Talroz elec'h e c'hoarien !...
Traou dremenet !... ha na 'z eint ken
Endro, birviken !

Oh ! pa zonjan en traou dremenet...
Ma c'halon baour, ma c'halon zo zammet !
Traou dremenet ha na 'z eint ken
Endro birviken !

Arc'hoaz vintin, savet mintin mad,
Me 'm o kuitèt ha kuitèt 'vit dalc'h-mad !
Keno d'ac'h-hu, ma Breiz-Izel,
Ma bro Breiz-Izel !...

A. PORZER.